

宋

史

翼

宋史翼卷三十八

韓維奏請裁而愈廣東南諸軍備通調而無近權維奏請使百官法道四級臣陸源輯

列傳第三十八

方技二

朱肱

唐慎微

張濟

趙令穰

郭熙

許道寧

周順

士衮

張擴

董元

李仲宣

史堪

張銳

宋道方

王浞

何澄

謝石

楊介

廖瑀

鄒寬

傅伯通

許叔微

馬和之

潘璟

劉松年

馬遠

夏珪

李嵩

孫章

葉子仁

史崧

陸灝

李明甫

卜則巍

楊賁亨

朱肱字翼中

一作亦中

歸安人

泊宅編

元祐三年進士

談志喜

論醫尤深於傷寒在南陽時太守盛次仲疾作召肱視之曰小柴胡湯證也請并進三服至晚乃覺滿又視之問所服藥安在取以視之乃小柴胡散也肱曰

古人製呷咀謂剉如麻豆大煮清汁飲之名曰湯所以入經絡攻病取快今乃爲散滯在鬲上所以胃滿而病自若也因依法旋製自煮以進二服是夕遂安因論經絡之要盛君立贊成書蓋潛心二十年而活人書成嘗過洪州聞名醫朱道方在焉因攜活人書就見朱留肱款語坐中指駁數十條皆有考據肱惘然自失卽日解舟去

泊宅編

屬朝廷大興醫學求深於

道術者爲之官師起肱爲醫學博士坐書東坡詩貶

達州以宮祠還僑居西湖上

北山酒經詩序

唐慎微字審元蜀州晉源人元祐間蜀帥李端伯招

之居成都貌寢陋舉措語言朴訥而中極明敏治病百不失一一語症候不過數言再問之輒怒不應其於人不以貴賤有所召必往寒暑雨雪不避焉爲士人療病不取一錢但以名方秘錄爲請以此士人尤喜之元祐間宇文虛中之父感風毒悞微療之如神又手絨一書約曰某年月日啟封至期舊恙復作取封開視則所錄之方第一療風毒再作第二療風毒上攻氣促欲作喘嗽如其言次第餌之半月良愈

宇文

虛中証類本草
改參賓退錄

徽宗大觀二年取嘉祐補注本草及

圖經本草合爲一書復拾唐本草陳藏器本草孟詵

食療本草舊本所遺者五百餘種附入各部並增五種仍采雷公炮炙及唐本食療陳藏器諸說收未盡者附於各條之後又采古今丹方并經史百家之書有關藥物者亦附之共三十一卷名証類本草上之

朝廷改名大觀本草

証類本草

張濟無爲軍人善用鍼得訣於異人能觀解人而視其經絡則無不精因歲饑疫人相食凡視一百七十人以行鍼無不立驗如娠婦因仆地而腹偏左鍼右手指而正久患脫肛鍼頂心而愈傷寒反胃嘔逆累日食不下鍼眼眦立能食皆古今方書不著陳瑩中

爲作傳云藥王藥王爲世良醫嘗草本金石名數凡
十萬八千悉知酢鹹淡甘辛等味故從味因悟入益
知今醫家別藥口味者古矣

邵氏聞見錄

趙令穰字大年藝祖五世孫也令穰生長宮邸處富
貴綺紈間而能游心經史戲弄翰墨尤得意於丹青
之妙喜藏晉宋以來法書名畫每一過目輒得其妙
然藝成而下得不愈於博奕狗馬者乎至於畫陂湖
林樾煙雲鳬雁之趣荒遠閒暇亦自有得意處雅爲
流輩之所貴重然所寫特於京城外坡坂汀渚之景
耳使周覽江浙荆湘重山峻嶺江湖溪澗之勝麗以

爲筆端之助則亦不減晉宋流輩嘗因端午節進所
畫扇哲宗嘗書其背朕嘗觀之其筆甚妙因書國泰
二字賜之一時以爲榮官至崇信軍節度觀察留後
贈開府儀同三司追封榮國公

宣和
畫譜

郭熙河陽溫縣人爲御畫院藝學善山水寒林得名
於時初以巧贍致工旣久又益精深稍稍取李成之
法布置愈造妙處然後多所自得至攄發胸臆則於
高堂素壁手作長松巨木回溪斷崖巖岫巉絕峯巒
秀起雲煙變滅晡霽之間千態萬狀論者謂熙獨步
一時雖年老落筆益壯如隨其年貌焉熙後著山水

畫論言遠近淺深風雨明晦四時朝暮之所不同則

有春山淡

一作豔

治而如笑夏山蒼翠而如滴秋山明

淨而如敝冬山慘淡而如睡之說至於溪谷橋徇漁

艇釣竿人物樓觀等莫不分布使得其所言皆有序

可爲畫式文多不載至其所謂大山堂堂爲眾山之

主長松亭亭爲眾木之表則不特畫矣蓋進乎道歟

熙雖以畫自業然能教其子思以儒學起家後爲中

奉大夫管勾成都府蘭湟秦鳳等州茶事兼提舉陝

西等買馬監牧公事亦深於論畫但不能以此自名

宣和
畫譜

許道寧長安人善畫山林泉石甚工初市藥都門時
時戲拈筆而作寒林平遠之圖以聚觀者方時聲譽
已著而筆法蓋得於李成晚遂脫去舊學行筆簡易
風度已著而張士遜一見賞詠久之因贈以歌其略
云李成謝世范寬死唯有長安許道寧時以爲榮宣和

諸書

周順鄱陽人醫有十全之功云古方如聖惠千金外
臺祕要所論病源脈證及鍼灸法皆不可廢然處方
分劑與今大異不深究其旨者謹勿妄用有人得目
疾用古方治之目遂笑出又有婦人因產病用外臺

祕要坐導方其後反得惡露之疾終身不差曾有士人得腳弱病方書羅列積藥如山而疾益甚令屏去但用杉木爲桶濯足及令排棹腦於兩股間以腳棚擎定月餘而安健如故南方多此疾不可不知願固名醫語必不妄故書以爲誡

通齋閑覽

士衮字補之東平須城人祖建中儒林自有傳四歲失父知孝其母跬步不去側年十五未嘗出門巷旣長以孝聞年三十五失母哀毀骨立杖乃能起兄才早世無嗣謹事寡嫂爲之立後旣壯又授之室分貲產贍之母病寒厥醫不能識補之痛恨遂學爲方

之稍以其術視人鄉閭賴焉數歲之後益明近自里巷遠暨他邑來問者相踵大抵所治貴保養賤攻取善用剛劑充虛斷下內固根本使賊邪自消非甚不得已不爲瞑眩或困憊危惓人莫能如何補之治之輒愈東平部使者所會又仕者尤眾凡疾不經補之不敢決以是延請無虛日而造門者黎明往伺見之已不逮則未昕而往猶屢返乃一遇或不得盥頰出對客然來者蟬聯遂不得休率常過午乃始飲食窮日之力以應接未嘗倦人多欲厚饋之辭不受或求藥草諸好用物以將意猶不肯盡取蓋橐中空虛妻

子曰闕之未嘗卹焉

學易集註補之墓誌

張擴字子充歙縣人少好醫從蘄水龐安時遊時同學六十人安時獨喜擴後聞蜀有王朴善脈又能以太素知人貴賤禍福從之期年得衣領中所藏素書盡其袂乃辭去南陵有富人子傷寒不知人氣息僅屬擴視之曰此嗜臥證也後三日當蘇蘇則欲飲飲飲與此藥必熟睡覺當得汗也已而果然當塗郭祥正子患嗽肌骨如削醫多以為勞擴曰是不足憂就坐飲以藥忽大吐使視涎沫中當有物也視之得魚骨宿疾皆愈在建業有婦人叩門求醫者擴不在其

弟揮爲診之及歸揮具言其狀擴曰弟與藥如是上
瘳矣此其脈當變居三年左乳下有誌也驗之信然
嘗有調官都下者擴診之謂曰蝦游脈見不出七日
當死後五日得通判齊州喜曰張擴妄言耳吾適得
官何謂死哉又二日晨起進盥仆地卽死建中靖國
初范忠宣公方召而疾作問曰吾此去幾何擴曰公
脈氣不出半年公曰使某得生至京師則子之賜已
遂與偕行至京師奏補擴假承務郎未幾公以不起
聞董正封知歙州擴以太素切其脈曰承議今歲當
奏子正封自以官不應格又非郊歲以爲疑適宛陵

有幕官至者與語及之客曰是不可信彼亦以此語許吾州守矣會徽宗登極守臣子弟例以捧表得官崇寧中黃誥待淮西提刑擴謂曰大夫食祿不在淮西行且還朝矣然非今日宰相所謂宰相者猶未起起則有召命不滿歲當三遷又曰大夫不病而細君病憂在九月及蔡京當國誥被召還歲中自戶部吏部遷左司郎中而妻劉亦適以九月卒尚書蹇序辰知應天府擴謂曰尚書無官脈旦夕當有謫俄被旨放歸田里復見之曰當得州果得杭州汪丞相微時祈門宰陳孺使徧視在學諸生次至公曰君位至宰

相然南人得北脈名宦當由北方起未幾登第謫北
京大名主簿不出北京積官至中奉大夫中興遂爲
上相謂胡殿院曰君當登第然心脈未圓歲在辛卯
見之曰不出此歲矣明年果登第擴後以罪謫永州
至洪州晨起見帥曰擴今日時加午當死後事以累
公帥曰何至是擴曰吾察之血已入心矣退使人伺
之及期卒揮字子發傳兄業爲人純孝有當士大夫
多愛重之

新安志

董元

一作源

江南人也善畫多作山石水龍然龍雖無

以考按其形似之是否其降升自如出蟄離洞戲珠

吟月而自有喜怒變態之狀使人可以遐想蓋常人所以不識者止以想像命意得於冥漠不可考之中大抵元所畫山水下筆雄偉有崱絕崢嶸之勢重巒絕壁使人觀而壯之故於龍亦然又作鍾馗氏尤見思致然畫家止以著色山水譽之謂景物富麗宛然有李思訓風格今考元所畫信然蓋當時著色山水未多能倣思訓者亦少也故特以此得名於時至其出自胸臆寫山水江湖風雨溪谷峯巒晦明林霏煙雲與夫千巖萬壑重汀絕岸使覽者得之真若寓目於其處也而足以助騷客詞人之吟思則有不可形

容者

宣和畫譜

李仲宣九江碑工黃山谷題其居曰琢玉坊崇寧中
刊元祐黨籍姓名太守使劉之李曰小人家故貧窶
因刻蘇內翰黃學士詞翰至飽煖名爲奸人誠不忍
下手守義之曰賢哉士大夫所不及也餽以酒從其
請王氏揮麈錄

史堪字載之

書錄解題

四川眉州人第政和進士官郡守

分類夷堅志

辛集

與劉岑友善嘗取岑詩示唐重

宛

錄劉岑撰

治病用藥初不求異炮炙製度自依本法

寄証精切不過三四服立愈

載之方跋

眉州人丹稜彭師

宋史翼

卷二十八

九

古年二十時得異疾不能食聞葷腥氣輒嘔惟用一
鐺旋煮湯沃淡飯數匙食之食已鼻中必滴血一點
懨懨疲削醫莫能愈乃趨郡謁堪堪曰君之疾在素
問經中其名曰食掛凡人肺六葉皆舒張如蓋下覆
於脾則子母氣和飲食甘美一或有戾則肺不能舒
脾爲之蔽故不嗜食素問曰肺葉焦熱名曰食掛蓋
食不下脾痰而成疾耳遂授一方服之三日覺肉香
啖之無所苦自此嗜食宿恙頓除

明刻分類夷堅志辛集

蔡元

長苦大腸秘醫不能通堪診脈已曰請求二十錢元
長曰何爲曰欲市紫苑耳末紫苑以進須臾遂通元

長大驚問其說曰大腸肺之傳送今之秘無他以肺

氣濁耳紫苑清肺氣此所以通也

北窗輯
炙錄

著有指南

方二卷凡分三十二門門各有論

解題

張銳字子剛鄭州人官成州團練使以醫知名政和中蔡京之孫婦有娠及期而病國醫皆以爲陽證傷寒懼胎之墮不敢投涼劑京密邀銳視之銳曰兒處胎十月將生矣何藥之能敗卽以常法與藥且使倍服之半日而兒生病亦失去明日婦大泄而喉閉不入食眾醫復指言其疵且曰二疾如冰炭又產葶甫近雖扁鵲復生無活理也銳曰無庸憂將使卽日愈

乃入室取藥數十粒使吞之咽喉卽通下泄亦止逮
滿月京開晏自諸子諸孫及女婦甥壻合六十人請
銳爲客京親酌酒爲壽曰君之術通神吾不敢知敢
問一藥而治二疾何也銳曰此於經無所載特以意
處之向者所用乃附子理中丸裹以紫雪爾方喉閉
不通非至寒藥不爲用旣已下咽則消釋無餘其得
至腹中者附子力也故一服而兩疾愈京大加歎異
盡斂席上金匕箸遺之刑部尙書慕容彥達爲起居
舍人母夫人病亦召銳於鄭至則死矣時方六月暑
將就木銳欲入視彥達不忍意其欲求錢乃曰道啓

之費當悉奉償實不煩入銳曰傷寒法有死一晝夜
復生者何惜一視之彥逢不得已自延入悲哭不止
銳揭面帛注視呼作匠語之曰若嘗見夏月死者面
色赤乎曰無然則汗不出而蹙爾不死也幸無亟斂
趨出取藥命以水二升煮其半灌病者戒曰善守之
至夜半大瀉則活矣銳舍於外館至夜半時守病者
覺有聲勃勃然遺屎已滿簾出穢惡物斗餘一家盡
喜遽敲門呼銳銳應曰吾今日體困不能起然亦不
必起明日方可進藥也天且明出門若將便旋然徑
命駕歸鄭彥逢詣其室但留平胃散一貼而已其母

服之數日良愈蓋銳以彥達有求錢之疑故不告而去紹興中流落入蜀王昶叔堅問之曰公之術古所謂十全者幾是歟曰未也僅能七八耳吾長子病診脈察色皆爲熱極命煮承氣湯欲飲之將飲復疑至於再三將遂飲如有掣吾肘者姑持盃以待兒忽發顛悸覆綿衾至四五始稍定汗下如洗明日而脫然使吾藥入口則死矣安得爲造妙世之庸醫學方書未知萬一自以爲足吁可懼哉

夷堅志

著有雞峯方

朱道方字毅叔以醫名天下居南京然不肯赴請病者扶攜以就求脈政和中田登守郡母病危甚呼之

不至登怒云使吾母死亦以憂去殺此人不過斥責
卽遣人擒至庭下呵之云三日之內不痊則吾當誅
汝以徇眾殺叔曰容爲診之旣而曰尙可活處以丹
劑遂愈田喜甚云吾一時相困辱然豈可不刷前恥
乎用太守之車從妓樂酬以千緡俾羣卒負於前增
以綵釀導引還其家旬日後田母病復作呼之則全
家遁去田母遂殂蓋其疾先已在膏肓宋姑以良藥
緩其死爾

王明清
餘話

王況字子亨本土人爲南京宋毅叔壻毅叔旣以醫
名擅南北況初傳其學未精薄遊京師甚悽然會鹽

法忽變有大賈覩揭示失驚吐舌遂不能復入經旬
食不下咽疰羸日甚國醫不能療其家憂懼榜於市
曰有治之者當以千萬爲謝況利其所售之厚姑往
應其求旣見賈之狀忽發笑不能制心以謂未易措
手也其家人怪而詰之况謬爲大言答之曰所笑者
輦轂之大如此乃無人治此小疾耳語主人家曰試
取鍼經來况設檢之偶有穴與其疾似是者况曰爾
家當勒狀與我萬一不能治則勿尤我當爲鍼之可
立效主病者不得已亦從之急鍼舌之底抽鍼之際
其人若委頓狀頃刻舌遂伸縮如平時矣其家大喜

謝之如約又爲之延譽自是翕然名動京師旣小康始得盡心肘後之書卒有聞於世事之偶然有如此者況後以醫得幸宣和中爲朝請大夫著全生指迷論一書醫者多用之

王明清
餘話

何澄宣和間人善醫有一士人抱病經年百治不瘥其妻召至引入密室中告之曰妾以良人抱疾日久典賣殆盡無以供醫藥之資願以身相酬醫正色拒之曰小娘子何爲出此言但放心當爲調治取效切不可以此相污萬一外人知之非獨使某醫藥不效不有人誅必有鬼責未幾其夫疾愈何澄一夕夢神

引入神祠有判官語之汝醫藥有功不於艱急之際
以色慾爲貪亂良人婦女上帝令賜汝錢五萬貫官
一資未數月東宮得疾國醫不能治有詔召草澤醫
澄乃應詔進劑而愈朝廷賜錢三千貫與初品官自
後醫道盛行京師號爲何藥院家

謝石字潤夫成都人宣和間至京師以相字言人禍
福求相者但隨意書一字卽就其字離折而言無不
奇中者名聞九重上皇因書一朝字令中貴人持往
試之石見字卽端視中貴人曰此非觀察所書也石
據字而言今日遭遇卽因此字黥配遠行亦此字也

但未敢遽言之耳中貴人愕然且謂之曰但有所據盡言無懼也石以手加額曰朝字離之爲十月十日非此月此日所生之天人當誰書也一座盡驚中貴馳奏翌日召至後苑令左右及宮嬪書字示之皆據字論說禍福俱有精理錫賚甚厚并補授承信郎緣此四方求相者其門如市有朝士其室儂娠過月手書一也字令其夫持問於石是日座客甚衆石詳視之謂朝士曰此閣中所書否曰何以言之曰也語助辭因知是公內助所書尊閣盛年三十一否曰是也以也字上爲三十下爲一字也然君官於此當力謀

運動而不可得否曰正以此撓耳蓋也著水則爲池
有馬則爲馳今池運無水陸馳無馬安可動也又尊
閤父母兄弟親人當無一存者以也字著人則是他
字今獨見也字而不見人故也又尊閤其家物產亦
蕩盡否以也著土則爲地字今又不見土也朝士曰
誠如所言但此皆非所問者今賤室以懷娠過月方
竊憂之所以問耳石曰是必十三個月也以也字中
有十字並兩旁二豎下一畫爲十三也石熟視朝士
曰有一事似涉奇怪固欲不言則君所問正決此事
可盡言否朝士因請其說石曰也字著虫則爲蛇字

今尊閣所娠殆蛇妖也石亦有薄術可爲以藥驗之
無苦也朝士大異其說因請至家以藥投之果下地
百數而體平都人益神之而不知其究挾何術也秦
檜當國時高宗書一春字命測之其上半體墨重石
奏曰秦頭太重歷日無光檜聞而銜之中以危法編
管遠州道遇一老人於山下亦善測字石就之書一
謝字求測老人曰子於寸言中立身術士也舉掌令
更書以卜所終石書一石字老人曰凶哉石遇皮必
破遇卒必碎矣時押石之卒在傍而書字在掌中故
云石大款服請老人作字測爲何如人老人曰卽以

我爲字可也石曰夫人而立山傍子殆仙哉乃下拜
願執弟子禮請益曰吾術似無減先生乃先生衷然
仙矣而茲吾不免塵網何也老人曰子以字爲字吾
以身爲字也

春渚紀聞

楊介字吉老泗州人以醫術聞四方有儒生李氏子
棄業願娶其女以授其學執子壻禮甚恭介盡以精
微告之一日有靈壁縣富家婦有疾遣人邀李生以
往李初視脈云腸胃間有所苦邪婦曰腸中痛不可
忍而大便從小便中出醫者皆以謂無此證不可治
故欲屈子李曰試爲導之若姑服我之藥三日當有

瘳不然非某所知也下小丸子數十粒煎黃芪湯下之富家依其言下膿血數升而愈富家大喜贈錢五十萬置酒而問之曰始切脈時覺乳脈現於腸部王叔和脈訣云寸乳積血在胸中關內達乳腸裏癰此癰主腸內所以致然所服者乃雲母膏爲丸爾切脈至此可以言醫矣李後以醫科及第至博士李植元秀卽其從子也

王仲言餘話

植宋史有傳

廖瑀字伯玉廬都人年十五通五經人稱廖五經建炎中以茂異薦不第後精父三傳堪輿之術卜居金精山自稱金精山人所著有懷玉經

安志

鄭寬字仲容師廖金精得其術爲汪伯彥卜地葬親
乃借堪輿家論貽書以勸之末云方今幽燕未歸版
籍朝廷有意恢復倘值此時場師整旅當勿計名位
高卑昌言於朝奮力請進必立希世功名若參之他
意微有更改妄觸一機百關俱廢汪是其言而不能
用丁未拜相鄭術果奇而書中之議竟托空言

安志

傅伯通德興人與鄭仲容同師廖金精金精得之吳
景鶴宋南遷伯通拜詔往相臨安表略曰顧此三吳
之會實爲百粵之衝錢氏以之開數世之基郭璞占
之有興王之運天目雙峯屹立乎斗牛之上海門一

點橫當乎翼軫之間雖云自昔稱雄實乃形局而
只宜爲一方之巨鎮不可作百禩之京畿駐蹕僅足
偏安建都難奄九有表上竟升杭州爲臨安府而稱
行在

安志

許叔微字知可眞州人紹興三年進士與龐安常同
爲宋一代醫師著普濟本事方十卷直探張仲景之
奧所謂黑錫圓神效散溫脾湯玉眞丸退陰散等方
識精理到足補前人所未及先是元祐庚午父歿母
憂慟氣厥牙噤里醫誤下而歿叔微始習醫深得其
理每見此證急以蘇合丸灌醒然後察其虛實調之

暴喜傷陽暴怒傷陰憂愁失意氣多厥逆經云無故而痞脈不至不治自己謂氣暴也氣復則已雖不服藥可也一人患項筋痛連及臂髀不得轉諸風藥不效叔微謂腎氣自腰夾脊至曹溪入泥丸今逆行至此不得通用椒附丸以引歸經則安歛縣尉宋省甫膀胱痛不可忍醫與剛劑益甚叔微候其面赤色脈洪大曰陰陽否塞疾虛不可以虛治宜先滌其邪以五苓散與葱合煮下搜如墨汁乃瘥王檢正希皋患鼻額間痛不仁漸連及口脣頰車髮際左額與頰上如餬手觸則痛極叔微謂飲食之毒聚于胃足陽明

受之傳入絡主以犀角解毒升麻佐之數日愈瘧人
李信遺得疾六脈沈伏按至骨則有力頭痛身重
腰指冷而滿噦醫者不識叔微曰此陰中伏陽伏見
無此證世人患此者多用熱藥則爲陰邪隔絕不克
導引眞陽反生客熱用冷藥則所伏眞火愈見消滅
宜破散陰氣俾火升水降然後得汗而解乃造破陰
丹鎔硫黃水銀令勻投陳皮青皮末冷艾湯下信道
服藥益加狂熱手足躁擾其家大駭叔微曰此換陽
也須臾少定已而病除叔微少時夜坐爲文左向伏
几案臥又向左後飲酒止從左下有聲久之脇痛減

食十數日必嘔酸水暑月止右畔有汗訪名醫徧試
諸藥皆不驗因自考其理謂已成策藁如潦水之科
曰不盈科不行清行濁停故積必嘔而去數日復作
脾惡濕而水則流濕莫若燥脾以勝濕崇土以填科
曰于是屏諸藥專服蒼朮三月愈其治傷寒皆宗守
仲景一士人得太陽病汗不止惡風小便澀而足攣
曲叔微診其脈浮而大謂仲景書有兩證一小便難
一小便利用藥稍差失以千里是宜桂枝加附子湯
三啜汗止佐以甘草芍藥湯足便得伸邱生病傷寒
發熱頭痛煩渴脈浮而尺遲弱叔微曰榮氣不足不

可汗以建中湯治之翊日脈尙爾其家幾不遜叔微
仍用建中至五日尺部方應然後汗之而愈撰傷寒
歌三卷凡百篇又有治法八十一篇仲景脈法三十
六圖翼傷寒論二卷辨類五卷

輟耕錄本事
方文獻通考

馬和之錢塘人紹興中登第官至工部侍郎善人物
山水筆法飄逸纖悉粉藻自成一家高孝兩朝最重
其畫嘗書毛詩三百篇命和之篇畫一圖會成巨帙
至今杭人嘗有存其散逸者其後有顧興裔者專師
和之但設色不逮耳

西湖游覽志

潘景字溫叟名醫也虞部員外郎張咸之妻娠五歲

南陵尉富昌齡妻娠二歲團練使劉彝孫妾娠十有四月皆未育溫叟視之曰疾也凡醫妄以爲有娠爾於是作大劑飲之咸妻墮肉塊百餘有眉目狀昌齡妻夢二童子色漆黑倉卒怖悸疾走而去彝孫妾墮大蛇猶蜿蜒不死三婦人皆無恙屯田郎中張譔妻年四十餘而天癸不至溫叟察其脈曰明年血潰迺死旣而果然又貴江令王霽夜夢與婦人謳歌飲酒晝不能食如是三歲溫叟治之疾益平則婦人色益溫飲酒易怠而謳歌不樂久之遂無所見溫叟曰疾雖衰然未愈也如夢男子青巾而白衣者則愈矣後

果夢則能食

夷堅志

劉松年錢塘人

畫法年紀

居清波門舊熙畫院學士紹熙

年待詔師張敦禮工畫人物山水神氣精妙名過於

師寧宗朝進耕織圖稱旨賜金帶院人中絕品也

畫

元銓

馬遠號欽山其先河中人世以畫名後居錢塘光寧

朝待詔畫師李唐布景齊整工山水人物花鳥種種

臻妙獨步畫院其樹多斜科偃蹇至今園丁結法猶

稱馬遠云兄達亦善畫子麟能世家學然不逮父遠

愛其子多於己畫上題麟字蓋欲其章也其時有蘇

顯祖葉肖巖亦師馬遠蘇筆法稍弱俗呼爲沒興馬
遠葉小景酷似而大幅不如也

西湖游覽志

夏珪字禹玉錢塘人寧宗待詔賜金帶山水布置殫
法與馬遠同但其意向蒼古而簡淡喜用禿筆樹葉
間夾筆樓閣不用尺界畫信手畫成突兀奇怪氣韻

尤高

格古要論

李嵩錢塘人李從訓養子工人物山水道釋又長於
界畫光寧理三朝待詔其徒有馬永忠豐興祖顧師
顏皆傳其法嵩老倦作多令永忠代筆其孫李章者

亦善畫

西湖游覽志

葉子仁上饒人推算筮占往往如破的歲乙酉真德秀方在班子仁以書勸補外甚力未幾果去國子仁每推論五行輒以善道勉人如孝弟忠信清心寡欲等語未嘗不懇切言之真贈以絕句云易象推占妙入神勸人忠孝更諄諄只今誰似君平衡惟有南陽賣卜人

信乘續葑

史崧成都人著有黃帝素問靈樞集註其自序云昔黃帝作內經十八卷靈樞九卷素問九卷迺其數焉世所奉行唯素問耳越人得其一二而述難經皇甫謐次而爲甲乙諸家之說悉自此始其間或有得失

未可爲後世法則謂如南陽活人書稱然逆者噤也
謹按靈樞經曰新穀氣入與故寒氣相爭故曰噤舉
而並之則理可斷矣又如難經第六十五篇是越人
標指靈樞本輪之大略世或以爲流注謹按靈樞經
曰所言節者神氣之所遊行出入也非皮肉筋骨也
又曰神氣者正氣也神氣之所遊行出入者流注也
并榮輪經合者本輪也舉而並之則知相去不啻天
壤之異但恨靈樞不傳久矣世莫論究夫爲醫者在
讀醫書耳讀而不能爲醫者有矣未有不讀而能爲
醫者也不讀醫書又非世業殺人尤毒於槌刃是故

古人有言曰爲人子而不讀醫書猶爲不孝也僕太庸昧自髫迄壯潛心斯道頗涉其理參對諸書再行校正家藏靈樞九卷共八十一篇增修音釋附於卷末勒爲二十四卷庶使好生之人開卷易明了無差別今崧專訪明醫更迄參詳免誤將來利益無窮功實有自

全蜀藝文志

陸曦奉化人以醫術聞於時新昌徐氏爲婦病產不遠二百里輿致之及門婦已死但胸間有微熱陸入視之良久曰此血悶也購紅花數十斤爲大鍋以煮之候湯沸遂以三木桶盛湯於中取窗格藉婦人寢

其上湯氣微又復進之有頃婦人指動半日遂蘇蓋以紅花能活血故也

船窗夜話

李明甫東陽人善醫尤精針法義烏令病心痛垂死明甫視之曰有蟲在肺下藥所不及惟砭乃可然非易也謬謂於背上點穴密取水以噀之令方驚而針以入日蟲已死矣既而腹大痛下黑水數升蟲乃去遂愈

兩浙名賢錄

卜則巍字應天贛縣人精形家言著作甚富所傳雪心一賦旨約而該業地理者咸宗之

安志

楊賁亨鄱陽人博羣書精脈理每心計造方有患飢

者諸醫以火證治賁亨久思之未得頃見堂上木橙
自仆乃爲濕氣所蒸致朽忽悟水能消物不獨屬火
此濕消耳投熱劑而愈又有顯者瘴目性躁日憂切
益不瘳賁亨給曰日可計日卽痊第懼毒發於股又
日撫其股憂之後目忽瘳而股亦無恙蓋誘其心火
下降爾術遂大名於時

白志

宋史翼卷三十八終

男樹

韓

校字

宋史翼

卷三十八

三

宋史翼卷三十九

點授終太學監夢巡廣東南韶連梅道調高廉道權福建道復司鹽法道加級臣陸心源輯

列傳第三十九

宦者

岑宗旦

樂士宣

李正臣

李仲宣

楊日言

劉瑗

梁揆

羅存

馮覲

賈祥

梁惟簡

張士良

裴彥臣

蔡克明

岑宗旦字子文開封人內臣慶厯初以父遺表通籍

壁門然趣尙高遠不爲苟合取容於世年十七棄官
遊東南山水間不復事事至和中仁祖錄功臣之世
復官之凡厯七任至元豐初又以尋醫事請方神考
大有爲之時王中正以才敏侍上嘗薦之於朝宗且
恥折腰強顏奔走於貴公子之前乃暫應召旨卒不
從仕故自壯年遂拂衣有歸與之志於是終九品官
而無復遺恨世頗高之暮年一無嗜好如道人衲子
寄傲親朋間優游卒歲略不爲身後計得酒輒醉酣
長哦揮酒以爲眞樂其作詩以意爲主不在錙銖語
言而已故若渾金璞玉見者知貴嘗賦聽琴詩其略

云琴中太古意方外無爲心彈之道頗散不彈理彌
深所以陶元亮何須絃上音其他皆類此又嘗取古
之善書者自漢迄唐凡十有一人爲論以評其書曰
張芝如班輪構堂不可增減鍾繇如盛德君子容貌
若愚語其眾妙足以爭造化者羲之也較其父屬但
恨乏天機者獻之也世南潛心羲之蓋若顏子之亞
聖徐浩比肩儒雅有類仲由之勇慤歐陽恂得其正
故如廟堂衣冠不失動靜柳公權得其勁故如轅門
列兵森然環衛懷素之閒逸故如翩翩眞仙眞卿之
淳謹故厚重如周勃至如李邕則舉動不離規矩而

有虧適變之道焉此皆其自得於心積學於外而其
吐論所以不愧古人者與然宗旦作字尤善行書如
銀鉤蠶尾脫去膩媚規模點畫當是蘇舜欽之亞顧
筆力亦窮於此矣當時既有書名人亦愛重字畫一
出偶得之者爭相買售治平中英宗嘗遣使諭旨令
書十扇以進宗旦卽書自爲十篇上之英宗爲之嘉
賞平時廩賜雖厚而周給貧匱隨手散去方其治時
以所藏書千餘卷及別業餽緡往歸姪孫筌家以就
侍養而筌能以事父之禮事之故得優游自適不復
以死生窮達爲念年逾七十神明不衰及其委蛻裕

如也

宣和書譜

樂士宣字德臣世爲祥符人內臣早年放浪不束於繩檢中年蒞職東太乙宮遂與錄師方外之士往往從游留心沖漠遂覺行年所過爲非以是一意於詩書之習方其未知書則喜玩丹青獨愛金陵艾宣之畫旣胸中厭書史而丹青亦自造疎淡乃悟宣之拘窘於是捨其故步而筆法遂將凌轢於前輩畫花鳥尤得生意視艾宣蓋奄奄九泉下人矣故當時有出藍之譽晚年尤工水墨縑絹數幅唯作水蓼三五枝鴻鵠一雙浮沈於滄浪之間殆與杜甫詩意相參士

大夫見之莫不賞詠士宣未嘗輕以示人凡所畫或以求之再三而幸得者皆藏之以爲好屢以畫上進實爲北省絕藝也士宣天資明敏晚以邊功超擢熙寧中神宗以謂夏童不恭乃肆大討嘗命李憲等以五路之兵進攻靈武期於一舉成捷嘗下詔曰如有敢議班師者以軍法從事至於師老儲之主帥方議班師無敢啟言者獨士宣毅然白於帥府請自邊乘驛七晝夕達奏至於京師神考欣然從之其時士宣方爲小行人之職而敢冒死犯顏以請者臣子之奇節也故知其胸中軒昂挺然不凡其見於丹青之習

特餘事耳官至西京作坊使持節虔州諸軍事虔州

刺史虔州管內觀察使致仕贈少保

宣和畫譜

李正臣字端彥內臣喜工丹青寫花竹禽鳥頗有生
意至於翎集羣啅各盡其態時作叢棘疎梅有水邊
離落幽絕之趣不作麤俗桃李雕欄曲檻以爲浮豔
之勝亦見其胸次所致思也官止文思使

宣和畫譜

李仲宣字象賢內臣始專於窠木後喜工畫鳥雀頗
造其妙觀柘雀圖其顧盼向背一幹一禽皆極形似
蓋當時畫工亦歎服之其所缺者風韻蕭散蓋亦有
所未至焉然人間罕見其本者以其寓意於燕雀之

微不求聞達以自娛爾官至內侍省供奉官

宣和畫譜

楊日言字詢直家世開封人內臣日言幼而有立喜經史尤得於春秋之學吐辭涉事雖詞人墨卿皆願從之游作篆隸八分可以追配古人尤於小筆妙得其趣其寫貌益精方仕宦未達而神宗識之拔擢爲左右之漸於殿廬傳寫古昔君臣賢哲繪像欽聖憲肅及建中靖國以欽慈皇太后寡真顧畫史無有髣髴其儀容者命日言追寫旣落墨左右環觀皆以手加額繼之以泣歎其儼然如生其精絕有至於是者作山林泉石人物荒遠蕭散氣韻高邁非世俗之畫

得以擬倫也官至中亮大夫晉州觀察使致仕贈昭

化軍節度使諡莊簡

宣和畫譜

劉瑗字伯玉京師人內臣持身端慤初終無玷時人謂五十餘年在仕而喜怒不形於色爲兩朝從龍未嘗自矜父有方平日性喜書畫家藏萬卷牙籤玉軸率有次第自晉魏隋唐以來奇書名畫無所不有故能考覈真僞論辨古今推其人世次遠近各有攸當故世所言書畫者皆率心服之凡中外之人有得繪畫而莫知主名者必以求瑗辨之瑗雖未敢定誰何然論之皆有所歸也瑗亦能放筆作雲林泉石頗復

蕭灝昔桓譚以謂能誦千賦自可爲之與此相類然
適意而止所傳乃不多非若專門積累於歲月者也
今瑗官至通侍大夫武勝軍承宣使贈少師謚忠簡
宣和
畫譜

梁揆字仲叙京師人內臣以蔭補入仕自齟齬之時
便喜刻雕及繪事及長因所閱甚多往往一見而便
能似其宿習花竹人物凡可賦象者一一能之率取
其名流高古之畫各擇其一以資眾善冀兼備焉揆
齒方壯若更加討論使就繩檢則有加而無已官任
左武大夫達州防禦使直睿思殿
宣和
畫譜

羅存字仲通開封人內臣性喜畫作小筆雖身在京國而浩然有江湖之思致不爲朝市風埃之所汨沒落筆則有煙濤雪浪扁舟翻舞咫尺天際坡岸高下人騎出沒披圖便如登高望遠悠然與魚鳥相往還此人後生若其學駸駸未已他日豈可量哉存官任武德大夫文州團練使充殿中省尙食局奉御宣和畫譜馮觀字遇卿開封人內臣少好丹青作江山四時陰晴旦暮煙雲縹緲之狀至於林樾樓觀頗極精妙畫金風萬籟圖恍然如聞笙竽於木末其間思致深處殆與秋聲賦爲之相參焉惜乎觀性習未甯但恐他

日參差耳觀今任武翼大夫永泰陵都監

宣和
畫譜

賈祥字存中開封人內臣少好工巧至於丹青之習
頗極其妙當時畫家者流一遭品題便爲名士時寶
和殿新成其屏當繪設色寫龍水於其上顧畫史雖
措手皆不當祥意上命祥筆之而神間意定縱筆爲
龍初不經思已而天矯空碧體制增新望之使人毛
髮竦立人皆服其妙作竹石草木鳥獸樓觀皆工時
人得之者遂爲珍玩至於雕鏤塑造靡所不能官至
通侍大夫保康軍節度觀察留後知入內內侍省事

贈少師謚忠良

宣和
畫譜

梁惟簡元豐八年充內東門使兼皇太后殿祗候元祐初御藥院超帶御器械勾管內東門太皇太后遣賜文彥博手詔寄文思副使以久在太皇太后殿祗應各有勤績除內侍押班添差勾當皇城司又于坤成節恩轉左藏庫使十月詔惟簡在太皇太后殿祗候近二十年累有勤績特與遙郡刺史蘇轍繳還詞頭韓維爭之尤力惟簡遂罷遷官勾管景靈宮二年遷西京左藏庫使尋爲嘉州刺史五年爲文思院使紹聖初坐援引陳衍得罪投竄四年屋宅錢物籍沒

入官

通鑑長編

張士良元祐中皇城使爲宣仁殿御藥紹聖元年二月與陳衍梁知新同罷士良提點醴泉觀任便居住六月添差監潁州酒稅章惇蔡卞恐元祐舊臣復起與邢恕謀所以排陷之計旣責呂大防劉摯等過嶺仍用王履疏高士英狀追貶王珪皆誣以圖危上躬其言寢及宣仁皇后最後又起同文館獄將悉誅元祐舊臣內結宦者郝隨爲助專媒孽垂簾時事建言欲追廢宣仁聖烈皇后士良已竄雷州元符三年惇卞逮赴詔獄使証宣仁有廢立意士良旣以舊御藥告并列鼎鑊刀鋸置前謂之曰言有卽舊官言無則

死士良仰天哭曰太皇太后不可誣天地神祇何可欺也乞就戮京惇無如之何元符三年三省據士良辭奏言士良以御藥院給事宣仁聖烈皇后與陳衍更直宮中掌文書衍主看詳進呈定其所降付士良書于籍其所降付某處其所從違某事皆衍自與奪頒降士良未嘗與聞羣臣有奏請東朝還政者衍輒詆之曰此不忠不孝之人也匿其奏置櫃中不以聞東朝亦不以聞于上及與呂大防往來以合密賜大防妻皆不聞上坤成節北使朝見太皇坐間痰發扶掖坐殿後御閣衍指揮簾外使臣虛進酒上食至畢

外廷皆不知衍又奏除范純仁左僕射文彥博平章
事于是翰林學士蔡京左諫議大夫安惇言臣等竊
觀上次事節大逆不道跡狀明白揆之以義獻之以
法死有餘責所有臣衍罪在不赦乞更賜審問正以
國法詔衍特處死徙士良編管白州崇甯初授左藏
庫使提舉鴻慶宮南京居住

長編參紀
事本末

裴彥臣元祐四年官內東頭供奉官蔡確貶新州彥
臣伴送奏言如確沿途稱疾卽添差遞鋪兵士用兜
橋槓昇前去從之元符三年右司諫陳瓘言彥臣無
甚幹才但能交通內外洩漏機密遂使物議籍籍或

香以爲萬機之事黜陟差除皇太后至今與也崇寧
元年九月令三省籍記姓名不得與在京差遣尋編
管池州除名勒停五年以九鼎赦移廣德軍

通鑑長編參紀

事本末

蔡克明未詳里貫徽宗卽位向太后權同聽政將復
用范純仁而意若未伸乃遣克明至永州就賜銀合
茶藥問勞委曲曰二聖甚知相公在先朝言事忠直
已虛位待相公不知目疾如何用何人醫治只爲左
右有不是當人阻隔相公又云太后問相公官家卽
位行事如何天下何說又云天下有何不便但奏取

來又云離闕日二聖再三命某言太后在宮中皇上
在藩邸甚知相公是直臣純仁至畿內又遣克明賜
銀合茶藥仍宣諭渴見之意蔡京蓄恨范正平及當
國言李之儀所撰范純仁行狀妄載中使蔡克明傳
二聖虛伫之意與之儀正平同逮至御史府之儀正
平皆欲誣服獨克明日舊制凡傳聖語受本于御前
請寶印出注籍內東門使從其家得聖語本有御寶
驗內東門籍皆同獄遂解崇寧三年編管桂陽監入
黨籍五年以九鼎赦移饒州

紀事本末李之儀范公行狀

宋史翼卷三十九終

男樹

韓校字

宋史翼卷四十

獲錄空所無而愈廣東南魁構道通西屬道通遠使司置法道加級臣陸心源輯

列傳第四十

姦臣

林特

子維

林顏

呂升卿

弟溫卿

和卿

練亨甫

錢通

林自

方天若

蔡碩

蔡懋

蔡條

蔡條

蔡崑

黃唐傳

章傑

吳开

黎確

呂源

朱宗

葉宗謬

葉份

黃潛厚

李文會

林一飛

傅伯壽

林行可

廖瑩中

林特字士奇南劍州順昌人祖揆仕閩爲順昌令因家焉特十歲往謁江南主李璟獻所爲文璟奇之命作賦頃刻而成授蘭臺校書郎江南平入朝累除大理寺丞景德初遷司封員外郎詔與宮苑使劉承珪崇儀副使李溥詳定江淮茶事自二邊用兵饋運仰於博易有司務優物估以輸河北及契丹通和邊儲稍緩物價差減而官給交引虛錢之名未改特等更

勸新法募人入金帛京師入芻粟塞下然後給茶資
有交引而未給者已給而未至者已至而未磨者悉
差分數折納入官仍約束山場園戶謹其出入歲課
糴錢果增其舊然初禁淮南鹽小商已困至是益嚴
急而民無餘利矣尋除右諫議大夫權三司使充修
玉清昭應宮副使特欲跨元武門爲複道爲左正言
夏竦所沮而止將祀太清宮遣特儲供具爲行在三
司使禮成累進真拜三司使是時天下完富丁謂以
符瑞土木迎真宗意特及劉承珪王欽若陳彭年附
和之踪跡詭異時論謂之五鬼特每見謂必拜一日

三見亦三拜之樞密使寇準惡特姦邪數與忿爭真
宗罷準樞密而特在位如故尋命爲戶部侍郎同王
清昭應宮副使復充修景靈宮副使兼管勾景靈會
靈觀事仁宗卽位遷刑部尙書翰林侍讀學士謂貶
特坐謂黨落職知許州還朝以戶部尙書知通進銀
臺司卒贈尙書左僕射子濊洙

福建通志

濊以父蔭歷白波發運判官慶厯中累遷三司鹽鐵
副使同管勾制置軍器司會入內都知張永和建議
收民餽舍錢十之三以助軍費事下三司濊助之甚
力三司使王堯臣奏濊附和狀詔罷濊副使出知滑

州久之遷祕書監改知汝州秦悼王墳域在汝宗室
附葬役兵無慮五千人淮使兵夫採薪芻治鐵石輦
致其家眾憤謀殺淮淮匿不敢出事聞詔淮致仕

福建

通志

洙官至司農寺卿知壽州臨事苛急鼓角將夜入州

廨按堂檻鐵鉤擊殺之

福建通志

林顏福州福清人登嘉祐四年進士元祐初遷提點
刑獄改知泉州紹聖中依附章惇蔡卞以進惇卞惡
陳次升使顏致己意賂以美官次升責之曰若爲天
子卿士而爲宰相傳風旨耶游厯光祿寺卿希兄弟

四人皆登第惟希與顏爲士論所薄云希子虞登元祐六年進士歷京畿開封縣主簿詳定軍馬司敕例刪修官紹聖三年試博學宏詞科第一遷太學學正終祕閣修撰

福建通志

呂升卿泉州晉江人登熙寧三年進士六年以王安石薦召爲館閣校勘提舉詳定修撰經義所檢討安石再相與惠卿不相能惠卿輒刪改安石詩義安石滋不悅旣而安石子雱進尙書義升卿奏乞不更刪改欲以媚安石復於神宗前訐安石之短復奏練亨甫以穢德爲王雱所昵且曰陛下不信臣有老母敢

以爲誓臺官言王安國非議其兄呂惠卿謂之不悌
放歸田里今升卿對陛下親詛其母比安國不旣重
乎於是落升卿職降授太常寺太祝監無爲軍酒稅
元豐三年復館閣校勘累遷太常寺丞嘗議郊祀致
齋之內不當先詣景靈宮及太廟朝享得旨罷景靈
宮諸處朝謁而天興殿及太廟朝享如故升卿遂上
疏曰自古有天下者莫重乎享帝歷攷載籍不聞爲
祀天致齋乃於其間先饗宗廟者也獨唐天寶之後
立老子廟號曰太清宮是歲將行郊祀以二月辛卯
先躬享焉甲午又親享於太廟丙申乃有事於南郊

雖論者以爲失禮然考其初致齋之日及辛卯享於太清宮至丙申殆且五日猶得雍容休息以見上帝也今陛下致齋三日其一日於大慶殿而用其二日三行禮焉於以奉宗廟則齋之日不足於以事上帝則齋之義不專陛下嚴恭寅畏三歲一修大禮將以受無疆之休其爲致齋者乃如此殆未稱昭事之意也臣愚以謂郊禮宜如故事致齋於大慶殿二日徑赴行宮以盡尊天致齋之義其天興及太廟朝享乞更不行俟禮畢而恭謝別修太廟躬祠之制則祀天享親兩得其當矣時不能行紹聖中出爲京東路轉

運副使徙河北路章惇與同文館獄欲殺元祐責隆
諸人召升卿察訪嶺南升卿欣然請行左司諫陳次
升亟奏曰升卿天資慘刻喜求人過今使按於元祐
臣僚遷謫之地投隙報憾何所不至哲宗大悟令升
卿還河北任升卿每云人勿犯我兄弟我兄弟直是
報警哲宗聞其語大駭之竟以是廢子源

福建通志

溫卿以奏補入官元豐初遷秦鳳路提點刑獄權知
秦州溫卿頗留心邊事嘗請修雞川水寨增築甘谷
城鉤考城寨隱陷荒田增刺漢蕃弓箭手詔皆從之
改河北西路提點刑獄紹聖中除直祕閣遷鴻臚寺

卿權發遣江淮等路發運使元符元年爲察訪使孫
傑劾罷令朝請郎曾鎮大理寺正張近同劾溫卿輕
設不肯置對近言溫卿所坐明白儻聽其蔓詞懼爲
株連者累詔以衆證定其罪溫卿願往舒州居住聽
敕到舒一日而卒

福建通志

和卿初以奏補爲定州曲陽縣尉熙寧中朝廷初行
免役法和卿首以曲陽戶等高下次第配役未及行
以父憂去服除復考太祖朝通檢簿并令文所謂手
實者爲書上之時惠卿方以參政領司農寺遂推行
焉其法令民自供手實糾告者賞之民不勝其擾惠

卿反以爲詳密累遷金部員外郎元祐初右司諫蘇
轍奏言和卿與惠卿共建手實法以根括民產爲本
以獎用告訐爲要估計下至椽瓦抄割不遺雞豚天
下騷然然其爲術迂疏卒不能得民要領乞行黜責
以警在位詔和卿權知台州明年責降通判袁州卒

福建
通志

練亨甫字葆光浦城人初遊太學從王安石子雱學
安石亦愛之熙寧五年發解第一明年登進士調睦
州司法參軍充國子監修撰經義所檢討嘗與御史
中丞鄧綰書自謂上若見唐虞三代之治不難致綰

九薦之除崇文殿院校書安石之再相也與呂惠卿
不相能惠卿既出安石亦屢求去會華亭獄久未決
雋切責亨甫及呂嘉問亨甫與嘉問議取綰所列下
制獄安石不知也惠卿上章訟安石安石問雋雋始
言亨甫所爲安石咎之雋憤恚死安石奏斥綰復言
綰聽亨甫遊說亨甫罷爲漳州軍事判官元豐四年
除名勒停編管均州移郴州

福建通志

錢適字德循縣之通化人世隱於農適自少彊敏記
問過人中熙寧九年進士第調洪州推官守將王韶
繇樞府出威重異常他僚屬不敢仰視會有疑獄適

正色爭辨至怒罵不少奪後卒如遁議轉信州厯常
眞二州燕衛王宮三教授通判越州吏挾守爲姦留
難訟者常百數遁攝府事纔二日獄爲一空及後爲
守姦吏望風遁去除校書郎徽宗立擢殿中侍御史
中丞豐稷論其回邪不可以任風憲不報稷復言必
用遁則願罷臣乃改提舉湖北常平夔峽轉運判官
通與利除害發擿姦伏風采凜然人畏之如神明崇
寧元年召爲都官員外郎復執法殿中劾曾布援元
祐姦黨擠紹聖忠賢布去遷侍御史閱兩月進中丞
首乞治元符末大臣乞復孟后而廢劉后事韓忠彥

會布李情臣黃履及議者曾肇豐稷陳瓘龔夬皆坐
賤遂與殿中侍御史石瑑左膚言元祐皇后得罪先
朝昭告宗廟天下莫不知哲宗上賓太母聽政當國
大臣盡變亂紹聖之事以逞私欲因一布衣何大正
狂言復還廢后位號當時物議固已洶洶乃至疎逃
小臣詣闕上書忠義激切則天下公議從可知矣今
朝廷既已貶削忠彥等及追褫大正誤恩則元祐皇
后義非所安孔子曰必也正名乎名不正則言不順
夫在先朝則曰廢后今日則謂之元祐皇后於名爲
不正先朝廢而陛下復於事爲不順考之典禮則古

昔所無稽之本朝則故實未有詢之師官則大以爲
不然況既爲先朝所廢則宗廟祭告歲時薦饗人事
有嫌疑之迹神靈萌厭默之心萬世之後配祔將安
所施宜早正厥事斷以大義無牽於流俗非正之論
以累聖朝明日又言典禮所在實朝廷治亂之所係
雖人主之尊不得而擅又況區區臣下敢輕變易者
哉元祐皇后得罪先朝廢處瑤華制詔一頒天下無
閒然者矣並后匹嫡春秋譏之豈宜明盛之朝而循
衰世非禮之事於是尙書右僕射京門下侍郎樞中
書侍郎益尙書左丞挺之右丞商英言元祐皇后再

復位號考之典禮將來宗廟不可從享陵寢不可配
祔揆諸禮制皆所未安請如紹聖三年九月詔旨后
繇是復廢適遂言元符皇后名位未正乃冊爲崇恩
太后適章所言小臣上書者昌州推官馮澥也其書
以爲先帝旣終則后無單立之義稽之逆順陛下無
立嫂之禮要之始終皇太后亦不得伸慈婦之恩雖
已迷之事難復之失然感悟追正何有不可解繇是
得召對除鴻臚主簿蔡京謀取青唐適助成其議會
籍元祐黨適以爲多漏略給事中劉達駁之左轉戶
部侍郎二年遷工部尙書兼侍讀三年以樞密直學

士知穎昌府未行言者疏其罪黜知滁州四年徙宣
州五年稍復直學士召還工部舉馮澥自代謂澥趣
操端勁古人與稽嘗建明典禮忠義凜凜薦紳歎服
言者又疏其罪以待制知秀州中書舍人侯綬封還
之又奪待制久之除集賢殿修撰知越州卽提舉江
州太平觀大觀二年會行八寶赦復修撰俄除顯謨
閣待制以疾請致仕四年起爲顯謨閣直學士政和
三年改述古殿皆領宮祠通家居十餘年無益之事
不爲惟築三大湖以利鄉民民深德之宣和三年方
臘陷婺道走蘭谿靈泉寺爲盜所刺年七十二盜平

州以聞有旨贈五官至大中大夫與遺表致仕恩澤
賜銀絹三百匹兩適無所不學晚尤深於歷書爲文
章明白簡切自成一家學者從之多爲名儒所著有
道文八十卷藏於家子楚材楚翁皆承事郎孫億年
字伯壽宣和七年以祖蔭入官乾道二年以右朝請
大夫致仕五年落致仕除利路提點刑獄不果上禧
熙十一年轉朝議大夫卒有詩號雲巢集云贊曰四
朝史有云瑤華失位而復也太母實詔之姑有還婦
之文母有改子之道播之天下合於至公誠哉是言
也適在當時孰謂其不知此理耶其意蓋有所循焉

尙執禮銘適之墓歎其剛方少圓死生負謗其厚於
揚善者哉

林自字疑獨興化縣人元豐五年由上舍生兩優釋
褐賜第紹聖元年蔡卞薦爲太學博士時卞方推崇
王安石自用卞意倡言於太學曰神考知王荊公不
盡尙不及滕文公之知孟子也士大夫咸駭其言自
與卞議毀司馬光資治通鑑板博士陳瓘聞之因策
士題引神宗所製序文自駭問曰此豈神宗親製耶
瓘曰誰敢言其非者自曰神宗少年之文耳瓘曰聖
人之學有始有卒豈有少長之異自語塞遽以告卞

卞乃密令東置高閣園子監舊有胡瑗祠自以瑗習
元祐學術奏於朝撤去三年除祕書省正字會稽謁
章惇求外補問惇曰今日廟堂所謂繼述者述神考
乎述荆公乎因道自前日滕文公語惇曰自妄言爾
確退惇呼自罵斥之惇卞自此不相能明年遷著作
佐郎方天若上書欲誅戮元祐大臣自陰與其謀已
而自亦論奏哲宗惡之遂不復用轉宣德郎以終

建

通志

方天若字彥稽莆田人紹聖四年廷試進士天若對
策大略以崇復熙豐法制爲主且言元祐大臣當誅

戮而不誅戮子孫當禁錮而不禁錮貲產當籍沒而不籍沒朝政政刑之失莫大於此宰相惇讀其卷大悅拔置第二人調彰信軍節度推官會星變下詔求直言天若登舟欲行聞詔復留上書指斥元祐臣僚以爲當黜邪黨異論上應除舊布新之象天若本蔡京門客其言蓋承京風旨也元符元年以徐鐸薦得召對除祕書省正字知樞密事會布奏天若險薄不可用哲宗領之右正言鄒浩之貶也著作佐郎周種嘗對天若言稱浩爲難得天若遽以告京京奏其語種由是得罪時惇已與京交惡以憾京故遂言天若

亦當逐乃出爲越州觀察推官移建州觀察推官京
富國召除校書郎歷通判泉州福建路轉運判官遷
湖南轉運使尋罷去起知泉州母憂服除累遷祕書
少監加右文殿修撰知泉州未行爲言者所攻遂致
仕天若爲京腹心起犴獄陷善士天下冤之

福建通志

蔡碩泉州晉江人登治平二年進士熙寧五年試治
邊策入選補武學教授調潁州團練推官元豐初累
轉武學博士尋除軍器少監時確已爲相碩恃兄勢
招權納賄爲駕部郎中吳安持所按確庇之安持反
坐謫語在安持傳先是碩壻文康世嘗述劉唐老告

文及甫語謂時事中變上臺當赤族其他執政奉行
者梟首從官竄嶺南紹聖中碩密令人告唐老與及
甫其結嶺南賁降元祐人謀爲變欲誅章惇蔡卞等
哲宗疑其事詔令京西轉運副使周秩體量久之無
狀事乃已宣和初碩已死蔡京令確子懋重理確定
策事懋詭言確嘗令碩約殿前指揮使燕達同擁護
遂贈碩待制高宗立始削奪

福建通志

蔡懋確次子也本名渭改今名紹聖元年太子少保
馮京卒哲宗臨奠懋京壻也於喪次關訴父確寃狀
章惇時爲左僕射力主之明日復確正議大夫懋以

是得敘蔭補官歷少府監主簿遂奏臣叔父碩叟於
邢恕家見文及甫所寄書具述元祐諸臣大逆之謀
及甫乃文彥博愛子必知當時奸狀詔翰林學士承
旨蔡京同權吏部侍郎安惇同文館鞠問及甫詞連
劉摯王巖叟梁燾問其證驗則無有也先是確母明
氏訴燾嘗對懷州人李詢言若不誅確則於徐邸安
得穩便朝廷封其狀不爲施行及劉唐老事作懋告
章惇曰唐老輩何足治曷不治梁燾章惇遂檢明氏
狀進呈於是并付蔡京安惇究治燾時已貶化州懋
欲陷徙惡地適詢以憂死乃寢懋始事京弟卞密聞

其兄弟後事京子攸復開其父子政和中懋以重賂
通京自謝前過且揚稱元豐末建儲京知開封府挾
劄子入內隨徐王有助定策功京素誕誇以功名自
詭聞懋言大悅宣和初京引懋上殿面陳誣罔語徽
宗惑焉封確王爵擢懋延康殿學士尋除試開封府
尹復結宦官梁師成請徽宗御製確傳立石墓前自
撰哲宗帝紀與宣仁雍王二傳送史館指斥垂簾政
事聞者莫不痛憤靖康元年金兵圍京師拜尙書左
丞命同右丞李綱巡觀城壕懋力言不可守與綱異
論綱罷懋代爲行營使金人縱數百騎薄城下間以

矢石中城上城上復者懋皆令答之金人請布囊數千揚言將以貯金移寨懋與之金人遂以實土塞河皇城火禁依軍法懋夜輒豎紅燈籠於城上復易建西北隅獨角阜旗人情洶洶以懋懷二心爲內應也及綱復出登城乃安金兵退臣僚交章劾懋建炎元年責授單州團練副使徙竄英州紹興四年死於德

慶府

福建通志

蔡絳興化軍仙遊人尙茂德帝姬拜駙馬都尉京貶子孫皆竄遠地絳以尙帝姬故獨免金人陷京師絳隨徽欽二帝北去居五國城紹興三年浙王鐸駙馬

都尉劉彥文在金告變金遣千戶孛堇攻打曷陳兵
河濱欲邀上皇渡河對辯果懼不測偉曰吾儕前日
不死國難捐軀報效正在今日偉身以貫高自處願
諸公盡力坐者皆泣下上皇遣萃王植同偉往孛堇
攻打曷尙執前議乃請欽宗行偉與信王榛駙馬都
尉向子居內侍王若冲從之往返詰問三日偉力辨
其誣鶚彥文皆坐死偉疏奏上皇乞深自悔禍以畏
天戒上皇嘉納之偉自陷金八年事上皇頗謹然猶
以王安石日錄爲言堅護紹述之局時論鄙之福建通志
蔡條字約之京季子也官至徽猷閣待制條在兄弟

間粗親翰墨京特鍾愛之然與攸不成攸有爲條必
反之攸與京謀奏請通延福宮景龍江路撤閤闔門
跨城爲複道飛橋入賜第得旨宣諭毀民居數千家
條夜草書力爭京愕然祕其章不肯出攸數白徽宗
請殺條徽宗曰太師老矣不許但削條官貶新州改
光州京恐條出則攸必陰害之因賞橋內宴拜懇徽
宗前乃勒停令侍養宣和六年京落致仕復以太師
總三省除條龍圖閣直學士兼侍讀凡京所判皆出
條手仍代京禁中奏事堂吏數十人抱文案以從中
外側目先是王黼領應奉司總四方貢獻之物以市

權寵條復剏置宣和庫式貢司中分諸庫如泉貨幣
餘服御玉食器貢等皆其名也元豐大觀庫及權貨
務見在錢物盡拘撥收椿以爲天子私財靖康元年
流竄白州紹興末尙請居無恙論者以爲倖逃顯戮

焉

福建
通志

蔡密京族子也性矯妄善談鬼神崇寧初與泉州布
衣呂注同召密著道士服入謁累官拜給事中兼侍
讀去位言者論其不學無文持道家吐納之說以爲
論思侍立集英瞑目自若爲不恭遂奪職陳正彙上
京變事且陳在杭州日聞密盛言京有後福詔下開

封鞠問獄上削密籍

福建通志

黃唐傳

選舉作唐傳

閩縣人崇寧二年進士歷官至宗正

少卿靖康二年金人犯闕唐傳盡取玉牒獻金帥金

帥令充事務官按牒搜押皇族出城張邦昌僭位差

權中書舍人高宗登極除直龍圖閣守起居郎尋遷

中書舍人黃潛厚之除延康也言者論其無名進職

唐傳草制極稱美潛厚及弟潛善擢徽猷閣侍制潛

善罷相御史中丞張澈并論唐傳罪罷職奉祠紹興

三年以宰相呂頤浩薦起除給事中明年殿中侍御

史常同奏唐傳獻玉牒事士大夫至今切齒望賜罷

黜以肅百僚奪職提舉太平興國宮二十六年復徵
猷閣待制同時受邦昌偽命者有朱宗葉宗諤葉份
福建通志

章傑建州浦城人登宣和六年進士建炎中歷福建
路轉運判官久之徙知衢州故相趙鼎子汾奉鼎喪
歸葬常山縣傑雅怨鼎當國時追治悖罪知中外士
大夫多與鼎簡牘往來欲掩取之以媚秦檜遣兵官
同尉翁蒙之以搜私釀爲名蒙之密以告汾語在蒙
之傳傑怒深治蒙之且追汾與故侍讀范冲之子仲
彪拘於兵官所蒙之母訴於朝檜知傑不專爲已而

借力以逞憾也不直之侍御史曹筠劾僉墨不法

罷歸

福建通志

吳升字正仲汀州清流人靖康初爲翰林學士承旨
金使王芮還朝廷遣刑部尙書王雲偕行少宰唐恪
令升撰議和書升詞有云若恤鄰存好則洪恩再造
提師復至則宗社殞亡識者哂其沮弱而不祥也已
而京城失守夜二鼓欽宗急宣札召侍從官升詐得
疾僵仆歸臥於家及金人遣使檢視府庫升遽出與
翰林學士莫儻首引金使入庫中欽宗之再詣金營
也升與宰執何栗曹輔等扈從金人變議遣升偕

上皇出城并取后妃諸王辭氣軒轅上皇爲之泣下
留守孫傅匿太子民間別求狀類太子者并內侍二
人殺之紿言宦者欲竊太子投獻都人爭之并傷太
子金人遲疑者五日并與僞督脅甚急太子卒不免
金人議立張邦昌令并密諭意自擁戴以至冊命并
僞朝入暮出傳道指揮京師人謂之捷疾鬼邦昌卽
僞位以并權同知樞密院事并爲邦昌謀散遣諸路
勤王兵故赦文首及之未幾邦昌以呂好問言避位
請元祐太后聽政并不自安辭免僞命高宗卽位并
自陳國家禍變不能死節乞正典刑疏三上詔充龍

圖閣學士提舉江州太平觀尋奪職永州安置紹興
二年再貶南雄州居住初秦檜嘗受升薦升後赦還
寓家嶺上檜憐之補升子祖棣高郵軍使御史中丞
魏師遜奏免官

福建通志

黎確邵武人靖康初歷官至侍御史張邦昌之僭位
也確受僞命嘗陳三事勸邦昌罷東南貢獻以收人
心又請邦昌修德以應天及邦昌求奉使止勤王者
確請行紹興元年試吏部侍郎除徽猷閣待制知漳
州明年進龍圖閣待制言者論其在圍城中汚僞命

奪職罷歸

福建通志

呂源升卿子以父蔭入官傾貲賂梁師成無何出師
廣西靖康中添差江淮等路制置發運副使奏請置
添六路酒稅以爲造舟之費民不勝其擾金人犯泗
州源遣人收淮北舟船數百泊南岸焚浮橋而遁事
聞除名紹興二年秦檜爲相源故與檜善復朝奉大
夫終廣西轉運副使

福建通志

朱宗字成德仙遊人以蔭補潁昌府長社縣尉累遷
給事中邦昌僭位以宗權刑部侍郎高宗登極坐僞
黨斥歸紹興初除直祕閣爲福建路轉運副使言者

論罷之

福建通志

葉宗諤泰寧人歷官戶部員外郎邦昌僭位除權司
農少卿建炎初有旨置宗諤受僞命事不問除戶部
郎中直龍圖閣充江淮制置使紹興元年改知洪州
爲言者所論罷久之遷江西路轉運使

福建通志

葉份劍浦人歷官庫部員外郎邦昌僭位以份權左
司郎中建炎三年除祕閣修撰充江淮等路發運副
使尋試戶部侍郎高宗幸越州夜得杜充敗奏份與
中書舍人綦宗禮堅主浮海議高宗遂決策移明州
份扈從金兵退試戶部尙書充龍圖閣直學士知泉
州久之提舉江州太平興國宮紹興十七年上章告

老詔遷一官致仕

福建通志

黃潛厚邵武軍邵武人歷官直顯謨閣除京東轉運副使高宗爲大元帥時師次東平潛厚與安撫使盧益率官吏出迎命兼大元帥府隨軍應副使及潛厚以李宗事入告以便宜加直龍圖閣高宗卽位南京除試戶部侍郎未幾擢尙書中書舍人劉珪奏潛厚乃右僕射潛善親兄不可同居一省乃改潛厚延康殿學士遷刑部尙書潛善罷相言者併及潛厚奪職提舉醴泉觀復責授祕書少監分司道州紹興五年落分司提舉台州崇道觀六年卒二十九年追復通

議大夫官其子孫育差

福建通志

李文會字端友泉州惠安人建炎二年進士紹興十二年除監察御史明年守殿中侍御史首論寄居士大夫干援州縣望嚴加戒約倘或不悛令監司郡守密具姓名聞奏重寘典憲不以赦原從之時臣僚與秦檜異論者多奉祠里居或僑寓他郡自是以次被罪矣直學士院洪皓自金國回與檜語及金事因曰憶室撚否別時託寄聲檜變色而起翌日文會奏皓傾事朱勔之壻資緣改官以該討論乃求奉使比其歸也非能自免特以和議既成例得放歸而資戀顯

列不求省母檜進呈黜皓出知饒州十四年遷御史中丞宗室令矜前以請留張浚爲檜所斥久之以事至臨安文會劾令矜昔爲大臣緩頰今復奔走請託詔送吏部仍日下出門禮部侍郎高閔侍經筵高宗問張九成安否明日語檜曰九成清貧不可無祿檜疑閔薦九成以語中書舍人楊愿愿遂嗾文會攻閔去之是日拜文會端明殿學士簽書樞密院事兼權參知政事文會自居臺職專以逢迎爲務問檜所不樂者上章彈擊惟恐後時然檜薦執政多不一年或半年必以罪罷居數月愿爲御史中丞察檜有厭文

會意遂論文會檢邪害政詔落職謫筠州居住二十
八年復端明殿學士卒於官

福建通志

林一飛字升卿仙遊縣人父正大觀四年上舍釋褐
官至左司郎中紹興間一飛與兄一鶚弟一鳴俱以
父蔭補官時秦檜當國日久引一飛爲腹心驟擢樞
密院編修歷屯田員外郎守右司員外郎檜病高宗
幸檜第問疾召權直學士院沈虛中草檜致仕制檜
子燬夜遣一飛見臺諫奏請除燬爲宰相高宗不允
檜死一飛遂罷明年一飛遣族人進士東投匭上書
論進退大臣當以禮侍御史湯鵬舉面奏禮爲忠賢

設使其奸詐如李林甫盧杞之徒自當明示典刑爲天下後世戒況檜死之後陛下禮意隆盡不可復加而一飛遣東鼓唱浮言動搖國是乞特賜懲戒詔責一飛監高州鹽稅東英州編管一飛卒貶所

福建通志

傅伯壽字景仁泉州晉江人隆興元年與弟伯成同登進士試中教官科乾道八年應博學宏詞科入選繇三館厯知道州入爲吏部郎官出知漳州紹熙初除直煥章閣改浙西提點刑獄處外久常鬱鬱及韓侂冑用事伯壽首以啟贊有云人無恥矣咸依右相之山我則異於獨仰韓公之斗侂冑喜甚力薦之召

除中書舍人直學士院慶元元年侍御史楊大法右
正言劉德秀乞以國是尊君等事訓飭在庭伯壽承
侂冑意草詔妄詆善類伯成屢引義責之不聽始朱
元晦與自得善伯壽嘗執弟子禮憾元晦登朝不薦
己及元晦罷歸請辭侍從職銜得旨依舊祕閣修撰
宮觀差遣伯壽行詞有大遼如慢小遼如僞語士論
薄之累遷禮部尙書出知建寧府值元晦卒伯壽以
黨禁故不上聞遣人致賻元晦家元晦家辭焉開禧
初侂冑倡開邊議伯壽貽書侂冑論金人必亡與中
國必勝之理而始末以勢未可勝爲言歷引古今用

兵成敗利害甚悉欲治其在我者以埃敵之毀頗中機宜然不足以掩其阿附之失也未幾卒侂冑既誅

追伯壽三官子度建康府樞貨務

福建通志

林行可字可叔侯官人乾道八年進士紹熙初知尤溪縣物有能稱自強入政府以同里故引爲已助不二年躡遷侍御史凡所論奏無非奉行韓侂冑風旨一日見執政忽大言曰平章可謂與天同心眾人以爲當用兵則從而用兵眾人以爲當議和亦從而議和時金人責縛送首謀行可見外議籍籍謂自強曰事至此恐不利於丞相及平章必盡去異議者乃可

安自強然之與侂冑謀還行可爲右諫議大夫明日行可方請對會侂冑誅計不行已而爲御史中丞衛

涇所論奪職罷歸

福建通志

廖瑩中字羣玉邵武軍邵武人少有雋才文章古雅登進士爲賈似道客似道賜第葛嶺吏抱文書就第署大小朝政一切決於瑩中宰執充位署紙尾而已似道自江上歸匿議和納幣之事詭報諸路大捷鄂園始解瑩中撰福華編稱頌救鄂功似道大悅奏瑩中籌幄之勞比他人爲最轉官外賜黃金百兩瑩中遂用之鑄匱器勒銘自詡以爲不朽嘗於西湖濱建

世綵堂在勤堂芳菲逕紅紫莊園林擅一時之勝及
似道穢職之夕與瑩中相對痛飲悲歌有泣瑩中歸
舍不復寢命愛妾煎茶服冰腦數幄妾覺之奪救已
無及翌日詔下除名勒停韶州羈管而瑩中已死

通志

建福

宋史翼卷四十

男樹

韓校字